



15. august 2019

UKA2019/100

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Pisortat sullississutaasa suliakkiissutigineqarnerannik atuinermi iluaqutaasunik qulaajaalluni UPA2021-mut naassuiaasiornissamik Naalackersuisut peqquneqarnissaannik Inatsisartut aalajangiiffigisassaattut siunnersuut, assersuutigalugu eqqiaaneq, aqqusinernik aserfallatsaaliuineq, illunik aserfallataaliuineq utoqqarnillu paaqqinninneq. Nassuiaat misileraalluni aqqissuussinnaanrmut inassuteqaatinik kiisalu misileraalluni aqqissuussinernik avammut suliakkiissutigineqarluarsinnaasunik nalilersuinermut inassuteqaatinik imaqassaaq.

(Inatsisartunut ilaasorta q Tillie Martinussen, Suleqatigiissitsisut)

Tunngavilersuut:

Nunami inunnik ilinniarsimasunik ikitsunik isumalluuteqarfiusumi pisortallu amerlasoorpassuarnik suliffisaqartitsivigisaanni pisortat ataanni immikkoortuni ataatsimut isigalugit isumalluutit ingerlatsiviillu pisariitsumik sunniuteqarluartumillu atorineqarnissaat qulakkeertariaqarparput.

Suleqatigiissitsisut isumaqarput sullississutinik suliffeqarfiit namminersortut pisortanit pitsaanerusemik suliarisinnaasaannik kommunit aamma Namminersorlutik Oqartussat suliakkiiffigilluarsinnaasaannik iternga tikillugu misissueqqisaarisooqartariaqartoq.

Isumaqarpugut pisortat taamatut suliffisaqartitsinerujussuat iluaqutissartaqaannanngitsoq. Pisortat immikkoortut ilaanni sullissinissaat pisariaqarpoq, imaanngilarli pisortat sullississutaat pisortat suliffeqarfiinit ingerlanneqartariaqartut. Namminersortut suliassanik pitsaanerusemik ingerlatsisinnaappata soorunami kissaatiginarpoq. Innuttaasunut, Namminersorlutik Oqartussanut namminersorlutillu suliffiuteqartunut.

Suleqatigiissitsisut isumaqarput inuussutissarsiortut ingerlallualernissaannut imminnullu nappannerulernissaannut nuukkiartortariaqartugut, misissorlugulu pisortani ajornartorsiutit ilaat namminersorlutik suliffiutillit suleqatigalugit aqqiisoqarsinnaanersut.

Suliakkiinerit soorunami nalaatsornerinnarmik pissanngillat, kisiannili niuerfinnik, sullississutinik suliffeqarfinnillu suliassanik assigiinngitsorpassuarnik neqerooruteqarsinnaasunik annertuumik pitsaasumillu misissueqqissaarnermik tunngaveqartariaqarlutik. Pisariaqartitsinerit qulaajaaffigineqartariaqarput sukumiisumillu misissoqqissaarneqarlutik aqqissuusseqqinnissamullu tunngaviliisariaqarlutik.

Taamaalilluni pisortat ikiorsiisarneranni suliassat pingaarnerit aallunneqartariaqarput nakkutigineqarlutillu, inuussutissarsiortullu assigiingitsunik sullissinissamut ukiorpassuarni aggersuni pisariaqarsinnaagunartunik pikkorinnerlersinnaallutik.

Neriutigaarput qulaani taaneqartut pissutsinik ajunngitsumik sunneeqatigiilersitsissasut, piginnaasaqartunik ilinniarluarsimasunillu sulisoqartitsilissasut pisortallu suliffeqarfiisa politikikkut ingerlatsinermik pisariaqartitsinerannik annikillisisinnaassasut, sulisartunik peqatigiiffinnillu piginnaasaqarnerusunik pilersitsissasut kiisalu suliariaatsinik pitsaanerusunik tamatigoornerusunillu pilersitsissasut.

Ajunngitsumik ingerlanneqarpata aamma inatsisit nutaat periutsillu nutaat suleqatigiilluni atuutilersinneqartarnerannik pitsanngorsaasinnaassagunarput. Tamakku tamarmik nunatsinni innuttaasunut iluaqutaasumik.

Naalakkersuisut ingerlatsivinni allaffinnilu immikkut ilisimasallit tapersiinerisigut inuussutissarsiortullu tapersiinerisigut nassuiaasiornissaannik kaammattarpagut.

Immikkoortorpassuaqarpoq nassuaasiornikkut nukinnik ataatsimoortitsiviligersinnaassatsinnik pisariaqanngitsumillu allaffissornermi pissutsinik tunngaveqarpallaarunnaartitsisinnaasunik marloqiusamillu allaffissortitsiunnaarsinnaasunik.

Pisortanut aningaasaqarnikkut allaffissornikkullu kingunissai:

Illimagineqarpoq nassuiaasiornermii ukiumut suliffissat marluk tamarmik immikkut A/C fuldmægtigip atorfianut ataatsimut kr. 500.000 missaannik akeqartut qaangerneqassanngitsut.

Namminersortunut aningaasaqarnikkut allaffissornikkullu kingunissai:

Soqanngilaq.

Innuttaasunut aningaasaqarnikkut allaffissornikkullu kingunissai:

Soqanngilaq.